

Rectificatif

Discours de Mme Marie-Josée Frank (CSV) remplaçant celui publié à la page 261 du Compte rendu N°8/2008-2009

4909 - Proposition de loi sur l'euthanasie et l'assistance au suicide

]]]] Mme Marie-Josée Frank (CSV).- Merci, Här President. Dir Dammen an Dir Hären, haut de Moien, wéi mer iwwert d'Palliativgesetz heibannen diskutéiert hunn, hunn ech mech an enger vill besserer Stëmmung gefillt, well d'Palliativengagement, dat setzt voll, fir sech ëm de Mënsch en fin de vie a senger Ganzheet anzesetzen.

Et ass haut de Moien a villen Diskussiounen hei ganz rësonnabel Argumenter duergeleucht ginn, wou ech och all deene Mënschen, déi haut hei geschwat hunn, mä Respekt muss ausschwätzen. An awer, muss ech soen, bedauern ech ganz staark, datt, wa mer haut hei e Gesetz zum Vote gestallt hunn, fir d'palliatiivt Enca-drement ze garantéieren, datt an den Aus-

soe vun haut de Mëtteg ganz vill Leit vun hiren eegenen Erfahrungs geschwat hunn.

An ech kann dat novollzéien, mä eent musse mer bedenken, Kolleeginnen a Kolleegen, mir liewen am 21. Jorhonnert. Haut gëtt et vill Mënschen, déi ënner net deene schwierige Konditiounen müssen hiert Liewensenn kréien, wéi dat an dem leschte Jorhonnert de Fall war. Ech hunn et haut de Moie scho gesot: Vill Mënschen hu missen onnëtz leiden, sinn onnëtz laang un enger Apparatedezin gehaange gelooss ginn a ginn et och nach haut. Mä ech hoffen, datt Dir meng Astellung esou respektéiert wéi ech Är respektéieren.

Ech muss haut an hei bezeien, datt ech nimools a menger 25-jähriger Praxis als Infirmière derbäi war, wou bewosst engem

Mënsch säi Liewen zu Enn gesat ginn ass. Ech soen lech awer, et ware Situatiounen, wou ech ganz jonk Infirmière war, an déi mer och haut, wéi ech haut an d'Chamber gefuer komm sinn, mer erëm a mäi Bewosstsënn komm sinn.

Et ass eng Patientin, déi hat ganz vill Péng. Ech si bei den Dokter gaangen an hu gesot: Déi Fra, déi muss gehollef kréien. Déi muss méi Morphium kréien. Den Dokter sot zu mir: Sprëtzt dräi véirel Dipidolor. D'Madame Stein weess, wat dat ass. Ech kann lech soen, ech hunn dat gemaach, war nach e bësse bei der Patientin, sinn erausgaangen, sinn op eng aner Schell gaangen, sinn no zéng Minutten erakomm, an d'Patientin war dout.

Un deem Beispill wëll ech lech soen, datt ech net an der Intentioun hat, deem Liewen en Enn ze setzen, mä déi Frau, déi hat immens vill Péng a si huet deemools schonn, ier mer vun engem Palliativgesetz geschwat hunn, gehollef kritt, fir datt se net méi esou vill Péng soll hunn. Awer d'Liewen ass doduerch verkierzt ginn.

An dat ass dat, Kolleeginnen a Kolleegen, wat mer am Palliativgesetz haut hei gestëmmt hunn. Fir mech ass d'Euthanasie, egal wéi een d'Kand nennt, egal wéi een et be- an ëmschreift, vun deem Moment un, wou den Élément intentiel, intentionnel um

Spill steet, dat bewosst Doutmaachen, bewosst déi Sprëtzt ginn, wou ee weess, elo gëtt a kierzester Zäit dem Liewen en Enn gesat, wou bewosst an der Proposition de loi steet, datt den Akt vun der Euthanasie en Acte médical gëtt.

Kolleeginnen a Kolleegen, dat sprengt bei mir d'Rumm vun deem, wat ech kënnst jee hei am Haus hëllefen ënnerstëtzen. Et ass hei vu Familljengeschichte geschwat ginn. Och ech hu meng Familljengeschicht. An ech si wierklech menger Mamm, menger Famill an all deenen, déi sech ewell säit Jor-zéngten an den Asaz vun de Mënschen en fin de vie këmmen a mat Häerz a Séil engagéieren, an déi wéi ech géint eng aktiv Euthanasie sinn, bleiwen ech bei menger Grond-, Grondiwwerzeegung. An ech kann och nimools och nëmme fir eng ofgeschwächte Form matstëmmen, do, wou mer soen, wou et ëm Exceptions d'euthanasie geet. Ech fäerten den Abus. Ech hunn Angscht virun der Kontrollkommissioun. Well wie garantéiert - an dat ass och haut de Moien hei gesot ginn -, wie garantéiert, datt dat an allen Detailer zu Recht analyséiert ginn ass? An duerfir, Kolleeginnen a Kolleegen, ech hoffen, datt Dir an all déi dobausse mäi Vote respektéieren.

Merci.

Présidence: M. Lucien Weiler, Président
M. Laurent Mosar, Vice-Président

Sommaire

1. 5758 - Projet de loi relative à l'obligation scolaire
 - Rapport de la Commission de l'Éducation nationale et de la Formation professionnelle: M. Fernand Diederich
 - Discussion générale: M. Gilles Roth, M. Eugène Berger (déposant un amendement)
2. 5760 - Projet de loi concernant le personnel de l'enseignement fondamental (suite)
 - M. Eugène Berger (dépôt d'un amendement)
3. 5758 - Projet de loi relative à l'obligation scolaire (suite)
 - Discussion générale (suite): M. Claude Adam, M. Robert Mehlen, Mme Mady Delvaux-Stehres, Ministre de l'Éducation nationale et de la Formation professionnelle
4. 5759 - Proiet de loi portant organisation de l'enseignement fondamental (suite)
 - Vote sur l'amendement 1 (rejeté)
 - Vote sur l'ensemble du projet de loi et dispense du second vote constitutionnel
5. 5760 - Projet de loi concernant le personnel de l'enseignement fondamental (suite)
 - Vote sur l'amendement 1 (rejeté)
 - Vote sur l'ensemble du projet de loi et dispense du second vote constitutionnel
 - Vote sur la motion 1 (rejetée)
6. 5758 - Projet de loi relative à l'obligation scolaire (suite)
 - Vote sur l'amendement 1 (rejeté)
 - Vote séparé sur l'article 4 (adopté)
 - Vote séparé sur l'article 5 (adopté)
 - Vote sur l'ensemble du projet de loi et dispense du second vote constitutionnel
7. 5847 - Projet de loi portant modification
 - 1) de la loi du 7 octobre 1993 ayant pour objet a) la création d'un Service de Coordination de la Recherche et de l'Innovation pédagogiques et technologiques; b) la création d'un Centre de Technologie de l'Éducation; c) l'institution d'une Commission d'Innovation et de Recherche en Éducation;
 - 2) de la loi modifiée du 25 juin 2004 portant organisation des lycées et lycées techniques;

- 3) de la loi modifiée du 22 juin 1963 fixant le régime des traitements des fonctionnaires de l'État
 - Rapport de la Commission de l'Éducation nationale et de la Formation professionnelle: M. Jos Scheuer
 - Discussion générale: M. Fred Sunnen, M. Eugène Berger, M. Claude Adam, M. Robert Mehlen, Mme Mady Delvaux-Stehres, Ministre de l'Éducation nationale et de la Formation professionnelle
 - Vote sur l'ensemble du projet de loi et dispense du second vote constitutionnel

Au banc du Gouvernement se trouve: Mme Mady Delvaux-Stehres, Ministre.

(Début de la séance publique à 9.01 heures)

]]]] M. le Président.- Dir Dammen an Dir Hären, d'Sitzung vun haut de Moien ass op.

Ech begrësse ganz häerzlech och d'Regierung an der Persoun vun der Madame Delvaux a wëllt se froen, ob se der Chamber iergendwellech Matdeelung ze maachen huet.

]]]] Mme Mady Delvaux-Stehres, Ministre de l'Éducation nationale et de la Formation professionnelle.- Neen, Här President, net elo.

]]]] M. le Président.- Très bien. Da kënnen mer direkt zum éischte Punkt vun eisem Ordre du jour vun haut de Moie kommen. Dat ass d'Diskussioun vum Projet de loi iwwert d'Schoullpflicht. Et si bis elo ageschriwwen: d'Häre Roth, Berger an Adam. D'Wuert huet de Rapporteur vun dësem Projet de loi, den honorabelen Här Diederich.

1. 5758 - Projet de loi relative à l'obligation scolaire

Rapport de la Commission de l'Éducation nationale et de la Formation professionnelle

]]]] M. Fernand Diederich (LSAP), rapporteur.- Här President, Madame Minister, Kolleeginnen a Kolleegen, dëse Projet de loi iwwert d'Obligation scolaire ass de 24. August 2007 duerch d'Madame

Minister vun der Éducation nationale déposéiert ginn. De parlamentaresche Grupp DÉI GRÉNG huet den 11. Dezember 2007 Virschlëi fir Amendementer eraginn. Niewent den Avisë vu véier Berufschamberen huet de Conseil d'État säin Avis a säin Avis complémentaire iwwert d'Amendementer vun der Chamberskommissioun ofginn. De Projet de rapport, deen eis haut virläit, ass an der Reunioun vum 7. Januar 2009 ugeholl ginn.

Bis elo sinn déi gesetzlech Bestëmmungen iwwert d'Obligation scolaire am Gesetz vum 10. August 1912 iwwert d'Organisatioun vum Primärschoulunterricht festgeluecht.

D'Situatioun huet sech natierlech zënter där Zäit wesentlech verännert, besonnesch nodeem, säit der Reform vum 3. Juni 1994, d'Komplementärklasse vum Primärschoulunterricht duerch de Régime préparatoire vum technesche Sekundarunterricht ersat gi sinn.

Haut ginn d'Schüler normalerweis op d'mannst dräi Joer vun hirer obligatorescher Schoulzäit an den Enseignement secondaire oder an den Enseignement secondaire technique. Sou datt et ubruecht ass, déi grouss Prinzipien iwwert d'Schoullpflicht an engem Spezialgesetz festzehalen, niewent dem Gesetz iwwert d'Organisatioun vum Enseignement fondamental, dat mer gëschter jo hei diskutéiert hunn.

Den Text, deem eis virlâit, schléit d'Verlängerung vun der obligatorescher Schoulzäit vun 11 op 12 Joer vir, mat als Ausgangspunkt den éischte Cycle vum Enseignement fondamental, deem obligatoresch ass fir all Kand dat véier Joer huet virum 1. September. Et besteet keen Zweifel, dass e längere Schoulbesuch mat engem beseren Encadrement derzou bäidréit, besser sozialiséiert a méi responsabel Bierger ze forméieren, besser forméiert Acteuren um wirtschaftleche Plang a Persounen, déi besser dorop virbereet sinn, sech den Erausforderungen an de schnelle Verännerungen an der Welt an an der Wëssensgesellschaft am Speziellen ze stellen.

Ausserdeem sinn d'Verännerunge vun de soziofamiliäre Strukturen e Grond, d'Dauer vun der Schoulpflicht ze verlängeren. Nëmmen zéng Länner vun der Europäescher Unioun, dorënner Lëtzebuerg, limitéieren d'Enn vun der Schoulpflicht op den Alter vu 15 Joer.

Par rapport zur aktueller Gesetzgebung bréngt de Projet de loi haaptsächlech folgend Ännerungen: D'Netbeuechtung vun der Obligation, de Précolaire ze besichen, gëtt sanktionabel. Bis elo war de Besuch vum Précolaire zwar obligatoresch, mä et bestoung keng penal Sanktiounen.

Dee méi contraignanté Charakter vum éischte Cycle vum Fundamentalunterrecht erkläert sech duerch d'Wichtigkeet, déi enger fréier Sozialiséierung an den éischte Léierschrëtt vun de Kanner bäigemooss gëtt.

D'Etüd iwwert den „Décrochage scolaire au Luxembourg“, deem de Ministère vun der Education nationale am Schouljoer 2006/2007 realiséiert huet, weist, datt de Prozentsaz vun de Schoulfbrieche an de leschte Jore staark ofgehall huet. D'Etüd beschäftegt sech mat deene Schüler, déi d'Lëtzebuurger Schoulen ouni Ofschlossdiplom verloossen, an - ënner hinnen - mat den Décrocheurs scolaires, déi sech a keng aner Schoul aschreien a keng aner Formation maachen.

De Fait, dass den Taux vum Décrochage zréckgaang ass, ass dorop zréckzeféieren, datt de Ministère de l'Éducation nationale de l'Exclusion scolaire zu enge vu senger Prioritéit gemaach huet. Fir d'Schüler mat Schwieeregkeete sinn zum Beispill d'Classes relais geschaf ginn, an e systematesche Suivi vun de Schüler duerch d'Action locale pour jeunes huet derzou bäigedroen, de Prozentsaz vun deenen, déi d'Schoul opginn, ze reduzéieren.

Trotzdem sinn et 9% Schüler, déi definitiv d'Schoul ouni Diplom verloossen. Als Ursaach ginn d'Schüler meeschtens e Mangel u Motivatioun un; de Fait, datt se keng Léierplaz fonnt hunn; den Échec; de falsche Choix, wat hir Formation ubelaangt, oder eng falsch Orientatioun.

D'Schoul muss preventiv virgoen, fir déi Jugendlech, déi a Schwieeregkeete sinn, iwwert d'Dauer vun der Schoulpflicht eraus an der Schoul ze halen, bis se eng Qualifikatioun erreecht hunn. Et ass fir d'Gesellschaft onméiglech, laangfristeg dës Schoulfbrieche, déi de Risque lafe marginaliséiert ze ginn, ze absorbéieren.

Aus deem Grond gesäit de Gesetzesprojet vir, datt Equipé vun Educateurs kënnen an deene Lycéeën agesat ginn, déi sech an engem Projet fir d'Verbleiwe vun de Schüler an der Schoul engagéieren.

De Projet de loi hält och déi dräi Unterrechtssproche vun der Lëtzebuurger Schoul explizit fest: Lëtzebuergesch, Däitsch a Franséisch. Derogatiounen dozou si méiglech zum Beispill fir d'Cours intégrés, zum Beispill am Portugiseschen an der Mammesprooch, oder fir de Bac international an englescher Sprooch.

Véierte Punkt, d'Obligation fir en neutralen Unterrecht ass och am Gesetz ageschriwwen. Am Respekt vun der Gewëssensfräiheet vun de Schüler ass et fir d'Enseignanté verbueden, mat Ausnahm vun den Enseignanté vun der Instruction religieuse et morale, hir perséinlech Convictionen duerch hir Kleedung oder en anert äussert Zeechen auszudecken.

D'Berufschambere begrëssen engersäits d'Extensioun vun der Schoulpflicht, mengen

awer, datt eng linear Verlängerung nëmmen eng quantitativ Moossmat ass, a vermessen eng richteg Strategie fir eng qualitativ Verbesserung vum Unterrecht.

Am Artikel 12 gëtt awer festgehalten, datt fir d'Schüler mat gravé Léierschwieregkeeten an de Lycéeën Aktivitéiten ugebued ginn, fir hinnen eng éducativ Hëllef unzébidden, se an hirer schoulescher Aarbecht ze ënnerstëtzen a se fir Aktivitéiten um sportlechen, kulturellen a gesellschaftleche Plang ausserhalb den normale Schoulzäiten ze interesséieren.

Fir dës Mesuren ëmzesetzen, gëtt d'Regierung autoriséiert, de Personalkader vun de Lycéeën an den technesche Lycéeën duerch d'Astellung vu 60 Educateurs gradués am Laf vun deenen nächste fënnf Joer iwwert den Numerus clausus eraus ze erweideren.

D'Chambre des Métiers an d'Chambre de Travail proposéieren, d'Schoulpflicht op d'Éducation précoce auszudehnen, fir op déi Manéier déi fréizäiteg Sozialisatioun an Integratioun vu Kanner mat verschiddenem kulturellen a sproochleche Background ze favoriséieren.

Heiansdo ass ze soen, datt eng méi grouss Responsabilitéit vun den Eltere gewënscht ass an datt se selwer entscheede kënnen, ob se op d'Offer vun de Gemengen zréckgräife wëllen, déi d'Éducation précoce ubidde mussen.

De Conseil d'État begréisst d'Bestëmmunge vum Projet de loi, fënnert awer, datt d'Artikelen iwwert d'Recht op d'Éducation précoce an iwwert d'Missiounen vun der Schoul net an d'Gesetz gehéieren. D'parlamentaresch Kommissioun besteet awer drop, datt am Artikel 2 festgehal gëtt, datt all Kand mat dräi Joer, dat op dem Territoire vum Grand-Duché wunnt, e Recht huet op d'Éducation précoce, déi déi erzéieresch Aktivitéite vun der Famill komplettéiert.

D'Kommissioun betount ausserdeem am Artikel 1 de Stellewäert vum öffentlechen Unterrecht, esou datt de Privatunterrecht nëmmen en alternative Charakter kann hunn.

D'Kommissioun ass och der Meenung, datt am Artikel 3 d'Missiounen vun der Schoul solle figuréieren.

D'schoulesch Formation favoriséiert d'Entwécklung vum Kand, seng Kreativitéit an d'Vertrauen a seng Méiglechkeeten. Si erlaben et him, sech eng Culture générale unzëeegnen, bereeden et op d'Berufsliewe vir an op d'Ausübung vu senger Verantwortung als Bierger an enger demokratescher Gesellschaft.

D'Kand gëtt erzunn zu den ethesche Wäerter, déi op der Déclaration universelle des droits de l'Homme baséieren, a gëtt dozou ugehalen, d'Gläichheet tëschent Jongen a Meedercher ze respektéieren. Fir d'Chancégerechtgkeet ze förderen, sollen entsprechend Moosnamen den Zougang vu jiddwerengem zu den eenzelne Schoultypen a Schoulniveauen, jee no senger Fäegkeeten a spezielle Besoinen, erméiglechen.

Den Artikel 7 beseet, datt all Kand, wat am Grand-Duché wunnt a véier Joer al ass, virum 1. September d'Schoul besiche muss. Hei ass also d'Obligation, während am Précoce eben den Droit ageschriwwen ass. Dës Obligation erstreckt sech iwwer 12 Joer ab dem 1. September vun dem betreffende Joer. Den Unterrecht fënnert statt an der öffentlecher Schoul, an all Coursen a schoulesch Aktivitéite musse regelméisseg besicht sinn. Viséiert sinn hei besonnesch Kanner, déi aus reliéise Grënn eng Dispens vun de Coursen an der Éducation physique oder der Biologie ufroe wëllen.

Den Unterrecht kann awer och ofgehal ginn an enger Privatschoul, enger Europaschoul oder am Ausland. Ausnahmsweis kann en och doheem stattfannen, ënnert de Bedingungen, déi duerch d'Gesetz festgeluecht sinn.

Kanner mat spezifesch Besoiné kënnen en differenzéierten Unterrecht kréien, jee no hire Besoinen, déi duerch eng Commission d'inclusion scolaire festgestallt gi sinn. Den Artikel 11 hält fest, datt de Schüler mat 15 Joer eng Léier kann ufänken an enger Formation en alternance, andeem hien d'Cours concomitants besicht vun der Berufsausbildung an domat der Obligation scolaire nokënn.

D'Gemengeverwaltung informéiert d'Elteren iwwert den Ufank vun der Schoulpflicht vun hirem Kand a schreift et d'office an der Schoul vum Schoulressort vun hirem Wunnsätz an. D'Eltere schreien hiert Kand an engem Lycée an, an deem Moment wou et d'Opnahmebedingungen erfüllt. Op Demande vun den Elteren hin a mat Genehmigung vum Gemengerot kann d'Admissioun an den

éischte Cycle vum Enseignement fondamental ëm e Joer zréckgestallt ginn, wann de Gesondheitszoustand oder déi physesche oder intellektuell Entwécklung vum Kand dat justifiéiert.

Mir hu gëschter gesot, mengen ech, datt et net méi méiglech ass, eng anticipéiert Opnahm ze kréien am Précolaire, well mer jo mat dräi Joer kënnen de Précoce da besichen. D'Eltere schécken hir Demande un d'Gemeng mat engem Certificat vun engem Pédiater.

Wann e Kand an der Schoul felt, mussen d'Elteren direkt den Titulaire respektiv de Régent de classe informéieren iwwert d'Motiver vun der Absence. Déi eenzeg legitim Motiver sinn: d'Krankheet vum Kand, den Doud vun engem Familljemember an de Cas de force majeure. D'Dispense vum Schoulbesuch kënnen op eng Demande motivée vun den Elteren accordéiert ginn, duerch den Titulaire respektiv de Régent de classe fir eng Dauer, déi net iwwer een Dag erausgeet, duerch de Président vum Comité d'école oder de Schouldirekter fir eng Dauer, déi iwwer een Dag erausgeet. Mat Ausnahm vun der Autorisatioun vum Minister kënnen d'Dispensen net méi wéi 15 Deeg, dovunner fënnf Deeg hannereneen, pro Joer bedroen.

De Schafferot oder de Büro vum Gemengesyndikat iwwerwaacht d'Anhale vun der Obligation scolaire. All Joer fir den 1. Oktober stelle se eng Lëscht op vun alle Kanner, déi an der Gemeng wunnen an ënnert d'Schoulpflicht falen. Wann de Schafferot oder de Büro vum Syndikat vum Président du comité d'école respektiv vum Direkter informéiert ginn ass, Infractiounen zum Gesetz feststellt, setzt hien d'Eltere schrëftlech a Kenntnis, d'Gesetz ze respektéieren, an informéiert se iwwert déi stroferechtlech Sanktiounen, déi se riskéieren.

Wann d'Elteren der Opfuerderung net nokommen an engem Délai vun acht Deeg vun der Mise en demeure un, informéiert de Schafferot déi territorial zustänneg Gerichtsinstanz. D'Amenden, déi kënnen ausgesprach ginn, beläfe sech op tëschent 25 an 250 Euro.

Dat war de Rapport iwwert d'Obligation scolaire, déi sech och areit an dee ganze Pak vun de Gesetzer, déi mer wéi gesot gëschter ugefaangen hunn ze stëmmen. Et ass och e wichteg Gesetz.

Ech wëilt heimatlech Merci soe fir d'No-lauschteren an den Accord vu menger Fraktioun bréngen. Merci.

Plusieurs voix. - Très bien!

M. le Président. - Merci, Här Rapporteur. Éischten ageschriwwene Riedner ass den honorabelen Här Roth. Här Roth, Dir hutt d'Wuert.

Discussion générale

M. Gilles Roth (CSV). - Här President, Madame Minister, Dir Dammen an Dir Hären, de Gesetzesprojet iwwert d'Obligation scolaire, also d'Schoulpflicht, ass textméisseg dee kierzeste Projet vum Reformpak iwwert d'Schoul. En ass awer duerfir net manner wichteg. De Gesetzesprojet regelt méi wéi déi eigentlech Schoulpflicht. Et ass vill méi eng Grondcharta, no där eis Schoul vum Précoce bis zu dem Lycée an Zukunft soll fonctionnéieren.

D'CSV-Fraktioun fënnert et richtig, dass niewent dem Artikel 23 aus der Verfassung och eng generell gesetzlech Rumm fir d'Schoul widerbesteet. Dat ëmsou méi, well dese Kader sech generell op all Kand applizéiert vum 3. bis zu sengem 18. Liewensjoer.

Ech félicitéieren dem Rapporteur Fernand Diederich fir säin ausféierleche schrëftlechen an och elo mëndleche Bericht.

Här President, mat deemem Gesetzesprojet huet an Zukunft all Kand mat dräi Joer e Recht op eng schoulesch Ausbildung. Iwwer zéng Joer nodeems de Précoce mat vill Gedeessens deemools duerch déi deemoleg CSV-Unterrechtsministerin Erna Hennicot agefouert gouf, gëtt en elo eng gesetzlech Pflicht souwuel fir de Stat wéi fir d'Gemengen. Si musse genuch Plazen an dem Précoce schafen, fir dass all Kand, egal wou et am Land wunnt, dëscht Recht och effektiv kann notzen. D'CSV-Fraktioun ënnerstëtzt dës Bestëmmung ausdrécklech. Si seet vill méi aus wéi en dräi Zeile laange Gesetzesartikel.

Här President, mat deemem Gesetz gëtt de Précoce en Deel vun der Schoulausbildung. De Stat verflücht sech, sech niewent den Elteren ëm d'Éducation vun all Kand ab sengem drëtte Liewensjoer mat ze bekëmmern.

D'Bildungshëllef vun der öffentlecher Hand ass fakultativ. Si muss net vun den Elteren

an Usproch geholl ginn. D'Eltere kënnen awer op dës Bildungshëllef ganz oder deelweis zréckgräifen. Maache se dat, ass d'Hëllef verfassungsrechtlech an der öffentlecher Schoul gratis. Et ass deemno fir de Stat an d'Gemengen och Pflicht, landeswäit deeselwechten Niveau vun der Ausbildung op deem Plang ze garantéieren.

An deem Kontext huet de Précoce fir d'CSV d'Aufgab vun der mëndlecher Alphabetiséierung. De Précoce huet fir eis d'Missioun vun der Sozialiséierung vun dem Kand ab sengem drëtte Liewensjoer.

Eis Gesellschaft huet sech a senger demographescher Zesummesetzung nämlech iwwert déi leschten 30 Joer bedeitend verännert. An de 70er Jore louch den Undeel vun der auslännescher Bevëlkerung bei 18%. Et hunn deemools knapp 65.000 Netlëtzebuurger bei eis gewunnt. Am Joer 2008 wunnen 205.000 Netlëtzebuurger am Land. An der Spillschoul louch am Joer 1970 den Undeel vun den auslännesche Kanner bei 21%. Haut läit den Taux bei ronn 45%.

1970 koumen déi auslännesch Kanner aus den direkten Nopeschlänner oder aus Italien oder Portugal. Haut ass d'Situatioun eng aner. Vill Netlëtzebuurger, déi bei eis wunnen, kommen aus ganz verschiddenen EU-Länner an oft vu wäit doriwwer eraus.

Mä och um Plang vun eise Famillje gëtt et verännert Verhältnissen. All zweet Bestiednis geet an d'Bréch. D'Zuel vun den Elengergéier gëtt méi grouss. D'Zuel vun den Einzelkanner hält zou. An ëmmer méi Stéit sinn déi zwee Partner berufstätig.

Evolution vun der Bevëlkerung, Sproochvielfalt vun der Schoulpopulatioun, verännert familiär Verhältnissen: All dese gesellschaftlechen Entwécklung muss d'Schoul sech stellen. D'Schoul steet virun enger verännenter Integratiounsmissioun.

Am Interesse vun dem gesamte sozialen Zesummenhalt muss d'Schoul sech dës Erausforderung duerfir esou fréi wéi méiglech stellen. De Précoce ass dorop déi richteg Äntwert. All Kand am Land, ob Lëtzebuurger oder net Lëtzebuurger, huet elo duerch d'Gesetz e Recht op eng schoulesch Bildung ab sengem drëtte Liewensjoer. Dat ass e wichtige Schrëtt fir méi Chancégläichheet. Duerfir begréisst d'CSV-Fraktioun dës Approche ausdrécklech.

Här President, de Gesetzesprojet beinhalt och eng Bestëmmung, déi d'Missioun vun der Schoul festleet. Esou soll d'Schoul d'Entwécklung vum Kand förderen an et op seng berufflech Zukunft virbereeden. D'Schoul soll d'Kand léieren, seng Responsabilitéit an der Gesellschaft ze iwwerhuelen, dat am Geescht vun den demokratesche Wäerter.

D'CSV begréisst et ausdrécklech, dass d'Missioun vun der Schoul an engem vun den dräi Basistexter iwwert d'Organisatioun vun eisem Schoulsystem verankert ass. De Statsrot seet, esou eng Bestëmmung hält an dem Gesetz iwwert d'Schoulpflicht keng Plaz. Fir d'CSV ass dëscht eng ze vill legalistesche Approche. Wann d'Grondcharta vun der Schoul hir Missioun rechtlech festleet, dann ass dat méi wéi eng Absichtserklärung. Et ass e Kader, un deem all aner gesetzlech Bestëmmung, Reglementéierung oder administrativ Circulaire sech an Zukunft muss halen an orientéieren.

D'CSV-Fraktioun fënnert et richtig, dass an deem Kontext och elo duerch d'Gesetz d'Elteren hir Plaz an der Missioun vun der Schoul hunn. Si si gesetzlech an de Bildungsprozess vun hirem Kand mat agebonnen. Dat ass eng grouss Verantwortung. Et ass e Recht, mä och eng Pflicht fir d'Elteren. Si sinn e vollwäertge Partner an der Virbereedung vun dem Kand op seng berufflech Zukunft a seng spéider Roll an der Gesellschaft.

An der Praxis heescht dat, dass op dem Terrain de Kontakt tëschent Enseignanten an Elteren am Interesse vun dem Kand méi enk a méi direkt ass, gëtt oder muss ginn. D'Partnerschaft tëschent Schoul an Elterehaus ass e feste Bestanddeel vun der Schoul. D'Fleege vun deemem Partenariat gehéiert zur Tache vun dem Enseignant. Et ass en Deel vun der Elterepflicht.

D'CSV-Fraktioun begréisst deemno, dass de Gesetzesprojet iwwert d'Schoulpflicht festhält, dass d'Missioun vun der Schoul déi ass, op déi individuell Stärken a Schwächen vun dem eenzelne Kand anzugeen. Dës verlaangt natierlech och verstärkt Mëttele an der Ausrichtung vun dem Schoulkonzept grad wéi och op dem Plang vun dem Schoulpersonal.

D'CSV ass duerfir der Meenung, dass d'Konzept, dat an deem neie Gesetz iwwert d'Schoulpersonal stoung, wat mer gëschter

diskutéiert an zréckbehalen hunn, nämlech den Enseignant als Generalist a jee no Bedarf mat fachspezifischer Ënnerstëtzung duerch Psychologen, Educateurs, Ergo-therapeuten, Assistants sociaux an esou weider, e richtige Schrëtt op dem Wee vun enger individueller Talentförderung vun deem eenzelne Kand ass. Eng individualiséiert schoulesch Betreierung vun dem eenzelne Kand ass e Pilier vun enger méi grousser Chancëgläichheet.

Här President, wann d'Schoul per Gesetz als Missioun huet, d'Entwécklung vun deem eenzelne Kand ze fördern, dann zielt dat net nëmme fir déi intellektuell Fäegkeeten. Zur Entwécklung vun dem Kand zielt och den Opbau vu senge physesche Capacitéiten. Dëst heescht, dass de Sportunterrecht an Zukunft méi eng grouss Roll an eisem Schoulsystem muss spillen, dat vun dem Précoce an der Spillschoul u bis zum Enn vun dem Lycée.

De Sport ass en Deel vun der Schoul, et ass keen Accessoire. De Sport muss an der Schoul déiselwecht Plaz hu wéi d'Rechnen, d'Franséisch oder d'Däitsch. Et geet net duer, fir dem Schüler a geléiertem Latäin de Grondsaz Mens sana in corpore sano anzetrüchteren, an en an der Praxis net ëmzesetzen. Et geet net duer, fir ze lamentéieren, d'Kanner wieren iwwergewichteg a kéinte kee Kopplabunz, wann de Sportunterrecht allze oft de Rang vun enger Sprangstonn huet.

(Interruption)

Bei deene volle Sportshalen a Piscinen am Land däerft et wuel manner un den Infrastrukturen hänken, d'Effortë musse virun allem gemaach gi bei der Ausbildung vun den Enseignanten, der Qualitéit vun dem Sportsunterrecht a virun allem sengem Stellwäert an dem Schoulsystem.

De Sportunterrecht ass an deem Kontext och kengem seng Chasse gardée. An der Grondschoul ass de Schoulmeeschter als Generalist fir e gudde Sportsunterrecht verantwortlech. Wëllt hien där Aufgab net selwer direkt nokommen, da gehéiert de Sportsunterrecht prioritär an d'Hänn vu Leit, déi doran eng Fachkompetenz hunn. Et ass an deem Kontext net nozevollzéien, dass de Sportunterrecht op ville Plazen am Land an der Grondschoul nach vu Chargés de cours gehale gëtt, a Leit, déi en ofgeschlossene Sportsdiplom hunn, mä sech am Concours fir Sportsproff net en rang utile klasséieren, am Primärschoulunterrecht allze oft nach als Persona non grata ugesi ginn.

Här President, de Gesetzesprojet iwwert d'Schoufflicht regelt och de Sproochegebrauch an eiser Schoul. Och op deem Punkt war de Statsrot an enger méi legalistescher Approche der Meinung, dass dës Bestëmmungen iwwerflësseg wieren, well d'Regelwierk am Sproochegesetz vun 1984 festgeluecht wier.

D'CSV begréisst et ausdrécklech, dass an esou engem sensibelen a wichtege Domän wéi der Schoul de Sproochegebrauch spezifesch geregelt ass. Lëtzebuergesch, Däitsch a Franséisch sinn d'Sprooche vun eiser Schoul. Si sollen dat och bleiwen. Eng wichteg Roll spillt do grad eis Lëtzebuurger Sprooch. Opgrond vun dem spezifische soziale Kontext, dee mir an eisem Land kennen, ass d'Lëtzebuergesch fir eis e wichtege Integrationsmotor. Dat besonnesch an der Schoul. Fir d'CSV sollt duerfir déi mëndlech Alphabetiséierung an dem Précoce an am Préscolaire op Lëtzebuergesch sinn. Néierenswou léieren d'Kanner méi séier an esou fréi en onkomplizierten Émgang mat eiser Sprooch. Dëst ass e wichtege Facteur vun eiser sozialer Kohesioun.

An de weidere Cyclé vun der Grondschoul ass d'Fro vun där da schrëftlecher Alphabetiséierung vill méi komplex, d'Äntwert dorop ëmsou méi schwéier. D'Flicht vun enger méi individueller Betreierung vun deem eenzelne Kand - an dat betrëfft am Sënn vun der Chancëgläichheet all Kand am Land, ob Lëtzebuurger oder net Lëtzebuurger - géif wuel och fir eng differenziéiert Alphabetiséierung plädéiere mat Schwéierpunkt op Lëtzebuergesch a parallel dozou an enger anerer Sprooch, ob Däitsch oder Franséisch, jee no sproochlechem Origine vun Schüler.

Am Groussen a Ganze wier dës Däitsch fir déi Kanner, déi eng germanesch Mammesprooch hunn, a Franséisch fir déi Kanner, déi eng romanesch Mammesprooch hunn. Déi drëtt Sprooch, jee no der Situatioun eben Däitsch oder Franséisch, géif da spéider als éischt Friemsprooch derbäikommen. D'Aschoule géif op dës Manéier méi einfach ginn, well d'Kanner am Ufank an där Sprooch gefördert ginn, déi hiren Mammesprooch am noosten ass, a se gläichzäiteg eng zolidd Basis an där Sprooch kréien, déi fir si am schwéiersten ass. Fir d'CSV muss all Kand no sengem

Ofschloss zolidd Kenntnisser vun de Landessproochen hunn, och wann een net all Sprooch op deemselwechten Niveau beherrsche muss. Mir musse mat eiser Méisproochegkeet esou ëmgoen, dass si keng Hürd ass, mä se als e grouse Virdeel am internationale Verglach notzen.

An deem Kontext stellt sech natierlech och d'Fro vun dem Engleschen an eiser Schoul. Op eiser Finanz- a Wirtschaftsplatz hält de Stellwäert vun dem Englesche permanent zou. An der Fuerschung ass et net aneschtens. D'Erausfuerschung ass also déi, fir dem Englesche méi eng grouss Plaz an eisem Schoulsystem ze ginn, ouni d'Schëff dobäi ze iwwerlueden.

Fakt ass awer och, dass am jonken Alter vun dem Kand bis den Alter vun 12 Joer bei eis keen Englesch enseignéiert gëtt, grad dann, wann d'Kand eng Sprooch spilleresch am einfachste léiert. Hei stellt sech dann och d'Fro vun dem Niveau, dee mir bei de Kenntnisser vun Däitschen a Franséische verlaangen. Et mag wuel deem engen oder anerem en intellektuelle Kick ginn, wann e Goethe oder Voltaire kann zitéieren, mä doriwwer eraus keeft hie sech op der Sich no enger Aarbecht domadder net ganz vill. D'Ufuerscherung vun der Zäit verlaange jiddefalls, dass mir eis iwwer e méi fréit Aféiere vun dem Engleschen an eise Schoulunterrecht de Kapp zerbrichen.

Et gëtt eng Hällewull Pilotprojeten an all méiglechen Domänen vun der Schoul. Esou wier et och emol un der Zäit, e Pilotprojet iwwert d'Englesch an der Primärschoul ze maachen. Aus eegener Erfahrung weess ech, dass en Engleschcours fir Kanner tëschent sechs an zéng Joer, déi am Kader vun enger Maison relais kierzlech an enger Gemeng uegebuede gouf, déi ech nawell gutt kennen, a manner wéi zwou Stonne komplett ausgebucht war. An d'Waardelescht gëtt all Dag méi laang.

Här President, een Eckpunkt vun dem Gesetzesprojet 5758 ass d'Verlängere vun der Schoufflicht ëm ee Joer. All Kand ass deemno gehalen, ab dem 4. Joer bis zum Alter vu 16 Joer an d'Schoul ze goen. Fir een, dee 15 Joer al ass, kann dat lescht Joer vun der Schoufflicht och duerch eng Berufsausbildung ersat ginn.

D'CSV steet fir dës Erweiderung vun der Schoufflicht. Fir eis däerft et awer net nëmme bei enger zäitlecher Verlängerung bleiwen. Duerch eng verstärkten individuell Begleedung vun dem Schüler op sengem Schoulparcours muss d'Verlängerung vun der Schoufflicht och qualitativ opgewäert ginn.

D'Verlängerung vun der Schoufflicht drängt sech op an engem internationale Kontext. Am Duerchschnitt ginn an den OCDE-Länner 82% vun de Jonken tëschent 16 an 18 Joer nach an d'Schoul. Bei eis am Land sinn et 72%, also ronn 10% manner. Jonk Leit, déi ze fréi hir Schoul ouni Diplom ofbriechen, fille sech oft an der Gesellschaft marginaliséiert. Erschreckend vill vun hinne fanne keng Aarbechtsplatz, jo wandere bei eis souguer aus. Si gesinn an hirem Heemechtsland keng Perspektiven.

All dat ass fir e räicht Land eng batter Feststellung. Chancëgläichheet an der Schoul heescht och, sech dës Méisstänn unzehuelen. Dobäi ass an der rezenten Vergaangenheet op deem Plang vun der Lutte géint de fréizäitege Schouloffbroch vill ënnerholl ginn. De Bericht iwwert de Gesetzesprojet grad wéi d'Avisë vun etleche Berufskummeren erwähnen hei psychologesche Betreuungsstrukture wéi de SPOS, d'Classes relais, d'Action locale pour jeunes. Dës Moossnamen hu mat bewierkt, dass de Prozentsaz vun de fréizäitege Schouloffbriecher, wéi de Bim Diederich dat elo gesot huet, an de leschte Jore vu 15 op 9% zréckgaangen ass.

D'Verlängerung vun der Schoufflicht bis zum Alter vu 16 Joer ass fir d'CSV e richtigen Usaz, well déi Jonk bis zu enger gewëssener Maturitéit kënnen a mussen duerch d'Schoul begleet ginn. Den differenzierten Unterrecht, déi individuell Betreierung vun dem Eenzelnen duerch d'Schoul huet also hire Sënn, souwuel am jonken Alter grad wéi am spéideren Alter vun dem Schüler.

All dat bestätegt d'CSV-Fraktioun doran, dass et e richtige Schrëtt ass, d'Missioun vun der Schoul an e gesetzleche Kader anzeschreiwen. D'CSV ënnerstëtzt an deem Sënn och d'Iddi vun enger Schoul vun der zweeter Chance, well mir gesinn doran eng konkret Measure, fir dass manner Leit ouni Ausbildung herno dostinn.

Mir plädéieren och derfir, dass d'Méiglecheete vun deem neie Gesetz iwwert d'Berufsausbildung richteg a schnell ëmgesat ginn. Grad iwwert dës gesetzlech Be-

stëmmung kënnen jonk Leit, déi keng esou liicht Léier hunn, nawell hir praktesch Talenter duerch Certificater oder Diplomer ausgewise kréien. Domat si fir si d'Diere vum Aarbechtsmaart och net definitiv zou.

Här President, de Gesetzesprojet iwwert d'Schoufflicht huet seng Plaz am grouse Reformpak vun eiser Schoul. D'Recht op eng Schoulausbildung ab dem drëtte Liewensjoer, d'Dauer vun der Schoufflicht, d'Recht op eng individuell Talentförderung vun deem eenzelne Kand, Partenariat tëschent Schoul, Kand an Elteren, de Gebrauch vun der Sprooch an der Schoul musse méi wéi eng politesch Absichtserklärung sinn. D'CSV-Fraktioun ass mat dem Kader, deem duerch dëst Gesetz fir d'Schoul gesat gouf, d'accord.

Eng konkret Ëmsetzung vun der neier Missioun vun der Schoul, déi de Jonke bis zum Alter vu 16 Joer elo begleet, plädéiert och fir eng Reform vun dem postprimären Unterrecht. Dëst ass dann d'Aufgab vun der Politik an zukünftege Méint a Joren. Mä ee Schrëtt nom aneren. D'CSV stëmmt haut elo emol dës Projéit, an ech soen lech Merci fir d'Nolauschteren.

» Plusieurs voix.- Très bien!

» **M. le Président.** - Merci, Här Roth, fir Är Ausféierungen. Den nächste Riedner ass den honorabelen Här Berger.

» **M. Eugène Berger (DP).** - Merci, Här President. Dir Dammen an Dir Hären, ech wëilt och dem Rapporteur Merci soe fir säi concisen a gudde mëndlechen a schrëftleche Bericht. Vun deene verschiddenen Texter, déi mer am Kader vun dem grouse Schouldébat vun 2009 diskutéiert hunn oder nach diskutéieren, ass et sécherlech deem Text, deem am mannste kontroverséiert ass. Hei ginn e puer wichteg Prinzipie festgehalten, a sécherlech muss een och dësen Text am Zesummespill mat deenen anerem Texter, besonnesch deem vun der Grondschoul gesinn. Et sinn och eng Rei Dispositionen, déi sech zum Deel kéinten iwwerschneiden, wat awer sécherlech net eng schlecht Saach ass.

Pour mémoire wëll ech och drun erënneren, dass déi viregt Unterrechtsministerin en Text ausgeschafft hat, deem an déiselwecht Richtung gaang ass an deen heimat dann och iwwerschaft ginn ass.

D'Haaptelement an deem virleiende Gesetzesprojet ass dat, dass elo d'Schoufflicht obligatoresch op 16 Joer erweidert gëtt. Keen dierft domadder e spezielle Problem hunn. Et kéint ee sech natierlech froen, firwat dat néideg ass, well am Endeffekt ass u sech net d'Dauer vun der Schoulzäit dat Wichtigst, mä d'Inhalter, dat, wat een an där Zäit léiert a vermëttelt kritt. Net d'Quantitéit, mä d'Qualitéit vun der Schoul ass relevant, fir et an anere Wiederer auszedrécken, a sécherlech ass et do wou mer mussen nach an den nächste Joren usetzen. Mä Virriedner huet et elo grad gesot: Ee vun deenen nächste grouse Chantieren, deem d'Chamber sech muss unhuelen, deem d'Experte sech mussen unhuelen, ass dee vun der Reform vun deene verschiddene Seondairen.

Et ass och kloer, dass am Endeffekt hei Schüler viséiert sinn, déi fréi an eisem Schoulsystem scheiterten an Échecen hunn an déi mer iwwert dës Wee versichen esou laang wéi méiglech an der Schoul ze halen, fir hinnen ze hëllefen. An ze hoffen, do-duerjer, dass se méi laang mussen an d'Schoul goen, hinnen och kënnen e Minimum vu Kompetenzen ze vermëttelen an hinne besser Chancë fir d'Liewen ze bidden.

Ënnert deem Bléckwénkel kéint een dëst Gesetz och e bëssen als en Ausdrock vun Onbehollefkeet a Scheitere vun enger vermeintlecher École de réussite gesinn, well wann d'Schüler eng normal Schoulcarrière am Secondaire maachen, egal a wat fir engem Beräich vum Secondaire, misste se jo gewéinlech bis 18, 19 Joer d'Bänk drécken an et bräicht ee guer keen esou en Text.

Mir sollten eis also bewosst sinn, dass d'Schoulschwieregkeete vu Jonken net automatesch geléist sinn, wa se elo am Plaz mat 15 mat 16 Joer kënnen vun der Schoul goen. Duerfir muss een och dësen Text am Zesammenhang gesi mat anere Projeten, wéi zum Beispill deem vun der École de la deuxième chance.

Ech wëilt domadder net schonns dem Projéit, dee mer wäerten an den nächste Wochen och an der Kommissioun diskutéieren an ënnert d'Lupp huelen, den Aval ginn. Vill méi wëll ech soen, dass mer egal wéi och an der Flicht sinn a bleiwen, fir Konzepter a Solutiounen ze fanne fir déi

Schüler, déi ze fréi an ouni Ofschloss aus eisem Schoulsystem de Moment erausfalen.

Ech kommen elo op verschidden Dispositionen aus dem Gesetz, déi ech kuerz wäert kommentéieren. Ech ginn net op all Punkt an; de Rapporteur huet dat gutt an exzellent gemaach.

Ee Punkt, deen an der Kommissioun méi laang diskutéiert ginn ass, ass den Artikel 5, wou et ëm d'Droe vu Symboler oder Insignen, wéi dat op Franséisch heescht, geet, déi Ausdrock vun enger reliéier oder politescher weltanschaulicher Iwwerzeegung sinn. Et gëtt festgehalten am Gesetz, dass d'Enseignanten net esou Insignen dierfen droen. Dat kënnen mir och voll ënnerstëtzen. Si enseignéiere viru Kanner, déi aus ënnerschiddleche Kulturen a Reliounen kënnen kommen, an do dierft keng Präferenz am Respekt virun de Kanner, virun hiren Opiniounen affichéiert ginn. D'Enseignantë mussen dat also am Sënn vun der Neutralitéit maachen, wa se Schoul halen.

Bei den Aarbechten an der Kommissioun ass och diskutéiert ginn, wat esou Insigné kéint konkret sinn. Bei reliéisen Objeten ass dat jo méi evident. Bei politesche wier dat zum Beispill e Pin oder awer och T-Shirts, wou dann e Slogan oder soss e spezielle Message kéint drop sinn. A sech misst dat, wat hei an deem Artikel formuléiert gëtt, eng Evidenz sinn an all öffentleche Schoul an et misst och den allgemenge Regele vun der Fonction publique entsprechen. Hei gëtt dat am Gesetzestext kloergestallt an dat ass gutt esou.

Mä wéi ass et mat de Kllassesäll, mat de Raim? Och do dierft et an där Logik an enger öffentlecher Schoul net esou sinn, dass Symboler vun enger Relioun oder enger Partei, egal wat fir enger, opgehaang dierfte ginn. Dat hätt een och kënnen an deem Text prezisiéiere respektiv an dem Projéit iwwert d'Grondschoul, wou et och ëm Gebaier geet, wou Kanner aus verschiddene kulturelle Milieuen oder Kanner, déi och verschidde reliéis oder weltanschaulich Ussiichten hunn, zesummekommen. Do soll och de Raum neutral gestalt ginn.

An de Virstellung vum der DP, dass an der Schoul keng Reliounen sollen e Virrecht hunn an dass en allgemenge Wäerteunterrecht am Plaz vun engem kathoulesche Wäerteunterrecht soll agefouert ginn, déposéieren ech och zu deemem Projéit Amendementer, déi sech an déi Serie vun Amendementer areien, déi ech zu dem Grondschoulgesetz an dem Personalgesetz agereecht hunn, fir dass dat Ganzt e Komplet gëtt.

Amendement 1

L'article 4 est modifié comme suit:

Art. 4.- Dans le respect de la liberté de conscience des élèves, la formation scolaire ne privilégie aucune doctrine religieuse ou politique.

L'article 5 aura la teneur suivante:

Art. 5.- L'enseignant ne peut manifester ostensiblement par sa tenue vestimentaire ou le port de signes son appartenance à une doctrine religieuse ou politique.

(s.) Eugène Berger.

Här President, ech hat och gëschter beim Personalgesetz deen diesbezüglichen Amendement net ofginn, wat ech dann hei nach wäert nohuelen.



2. 5760 - Projet de loi concernant le personnel de l'enseignement fondamental (suite)

Amendement 1

L'article 26 est remplacé par le texte suivant:

Art. 26.- Le cours d'éducation aux valeurs est assuré par un instituteur ou un chargé de cours dans les locaux de l'école que fréquentent les élèves.

(s.) Eugène Berger.

» M. le Président.- Merci.